

摘藻堂四庫全書薈要

集部

欽定四庫全書會要

集部

止齋集卷十一

九至

詳校官助教臣謝登雋



欽定四庫全書薈要卷一萬五千八百九十四

集部

止齋集卷九

宋 陳傅良 撰

挽詩

擬進御製孝宗皇帝挽詞五首

九廟威靈遠

遠一作重

三宗德業尊謳歌思藝祖歷數在神

孫欲返皇圖正先推帝繫恩諸儒議東嚮此意定初元

謂以隆
興紀元

但謹雞鳴問何知鶴髮侵石經方典學盟載更關心四
海堯喪畢三年舜慕深匆匆付神器長樂尚沾襟

神機規禹迹鬼膽破胡兒大號初歸我成功少待時韃
橐懷不滿簞食問何遲河洛空遺恨年年上玉卮

好學元無數忘疲晚有加明謨宗六藝妙用合三家照
映天經緯流傳士齒牙奎文尊閣處更合榜重華

群才何輻輳聖度似天寬清蹕留儒館黃金散將壇風
雲一語合日月萬人看攀附今無路哀摧壯士肝

孝宗皇帝挽詞五首

藝祖開皇極何心畀後昆天將翊堯運世復見湯孫武
接規模在仁追典則存煌煌宋宗社永永配乾坤

深衷何自見寬詔不勝書當宁延方岳逢人問里閭歲
為周委積家被漢蠲除巷哭彌天遠長江淚不如

豈以崇高極能忘凜凜憂衣更三澣舊費為十金休熊
館無秋獵期門絕夜遊恭惟懷顯德真可締孫謀

正觀真英主三王合庶幾此時生後聖端欲踵前徽濟

世功何異除兇志偶違辛勤三十載十漸更無譏
不作脩齡夢天乎詎可謔白雲新厭世黃屋舊非心德
業成千古閭閻寢八音烏號在何許霜重越山岑

挽吳明可給事

諸老俱淪落流風日轉移獨懷憂國意長說渡江時姓
字誰如此功名早不疑却收湖海氣燕坐雪垂頤

憶上諸生謁公方薄恙侵欣然蒙絮帽恨不醉花陰自
說看人熟相期晚歲深半天蒼嶺雪回首為沾襟

謁公
之夕

宿蒼嶺下天大雪
明日嶺上深數尺

挽木奉議

蘊之詹
事尊人

寵數頻年及俞音萬口傳豐碑來少海大軸落台躔教

子宜如此聞風亦凜然送車今塞道拱木看參天

東宮
為寫

榮慶二字史丞
相以詩賀之

盛事無虛得玄襟可自知徧觀同輩行誰似暮年時袞
冕趨椒殿簫韶送玉卮又宜天一笑獨此有遺悲

悼蔣昇仲承事

扁舟來往適吾真却笑旁觀道隱淪三釜豈無兒可就
百年要與酒相親賸栽梅竹皆緣客晚得冠裳不語人
試向南塘問漁牧定於此老亦沾巾

挽族叔父

松竹深園屋梁蓮賸種魚所愁賓客少不問稻梁餘盡
日禽相語盈門手自書吾兒有名字萬事聽何如

我懷終古恨不及奉觴時滿眼看諸弟何心賦此詩牛
羊來蟄蟄丘墓去纍纍亦有千鍾養曾無一字碑

蕃叟
自為

尊人
埋銘

題丁少詹姑墓誌後

白髮從夫志青芻為客謀送車今幾兩樂土有斯丘

歸葬

于父黨

猶子聲名甚他時雨露秋摩挲省石刻嗟惜到松

楸

挽樓朝奉

裘馬朋簪盛緋魚筦庫卑行藏公論在然否寸心知歲

晏曾三接民功僅一麾空餘華袞字有恨益棺時

史少傳銘

墓其

九寺方連茹專城又夾河晚看諸子好孰與一門多薄
海皆驚嘆亨衢忽薦瘥大連同厚夜其柰少連何

挽包顯叟

樵牧常爭席篇觴早策功有懷隨事見不耻與人同我
故竒諸子年來識此翁待看稽古力喬木已悲風

翁子看時輩平生不妄賢獨於公有誅惟恐世無傳他
日須深刻吾詩可附聯草黃松栢禿名與石歸然

翁誠之作

狀行

挽張子由母

又是君王上玉卮
未央雨露湛垂垂
版輿此去還無恙
芝檢重來更不疑
四世團圞能有幾
百年澌盡亦堪悲
里中諸母今誰在
聽說承平祐聖時

挽潘才叔母

剝啄唯深夜
門前杙小船
有兒能自致
此母已堪傳
竹院前聞熟
桓楹大字懸
病懷嗟不及
健筆附諸賢

才叔所居

有竹
院

挽周宣義

魯山司
法尊人

無酒澆陳草將詩刻隧碑遺名從此在真意竟誰知教
子還餘事周人亦有時憶嘗從夜話欲去更遲遲

挽婺女何茂宏

勸駕嘗連萼應門忽二毛竟於時不偶吾更晚相遭宿
草堪揮淚豐碑忍泚毫送車今幾兩誰最戀緇袍

挽薛季益尚書

徧試江淮聲籍籍久勞荆蜀鬢蒼蒼同時半已登槐棘
卒歲纔能足稻粱遺藁不為他日計佳城尚及此丘藏
豈無後作多文勝令我懷人淚欲滂

州里誰如此達尊戶庭深靜最情敦不將尺牘通當路
却枉扁舟訪杜門每見色溫如有屬欲書心愧不能言
從今若祭粉榆社好配橫塘兩獻樽

公與許忠簡
公居同鄉

挽彭通直

子復監
丞尊人

前輩如同郡流風僅幾人不令兒巧宦所尚世清貧及

老猶書卷通班但幅巾吾銘雖未就鄉譽勝堅珉

挽沈次卿學正

洛學傳當代家聲屬此翁一生無世味萬事與人同恨
不師前鄭欣賞客阿戎宜銘千古意豈在語言工

挽林承信

道夫教
授尊人

重交寧問田安在急義固於官不知撫仕幸多花萼好
幽棲宜與竹林期床頭周易吾將老案上楞嚴晚得師
此意自應天子後嶧陽未琢長孫枝

悼林仲逸縣尉

家故書千卷生纔試一斑賞音殊不少筮仕獨何艱松
菊將身隱頻繁忽涕潛幸哉賢玉潤有誄不容刪

挽張材卿知郡

大猷端明之子
春卿尚書之弟

貂蟬不逮老端明世濟誰如好弟兄能着青衫偕計吏
却將白髮去邊城夜魂俄斷凝香寢秋淚仍兼曳履聲
萬石君家同一傳嗣書應更有公卿

挽新昌呂脩職

頃作庵廬客省公手種蒔溪毛無亂理宰木有連枝久
欲鑿他石今還賦此詩黯然懷宿昔絮酒定何時
不道千山阻將遺百世名有兒能自致此老已堪銘祿
豈無三釜賢誰似一經吾詞雖未就應有護幽局

挽尤延之尚書

自為師說竟誰宗每事持平屬此翁有志政須名節是
斯文非獨語言工要令舉世人材出合在前朝行輩中
安得長年留把柁後來各與一帆風

宿留江湖長子孫行藏節節耐人看及為侍從身垂老
欲試平生事轉難書就僅題前太史功成方記舊甘盤
令人長恨經綸意歷事三朝見一班

向來諸老獨歸然羸不勝衣萬事便燈下細書批勅字
雪邊先着趁朝鞭豈應無故令身健却止功名與世傳
遺奏定留封禪藁憑誰吹送九重天

壯歲從游兩鬢霜重來函丈各堪傷那知卒業今無及
極悔論心昨未嘗相約歸期須次第獨存病骨更淒涼

他年賴有門生記託在碑陰永不忘

挽沈虞卿侍郎

官重元非好思間樂有餘生兒早傳業課女夜抄書時
事方關念歸懷不遂初經綸緣未了天意盡留渠
嗜古真成癖摩挲笑眼開斷編遺汲冢名篆出秦臺禽
鳥緣應盡雲山喚不回淒涼子雲宅問字有誰來

挽東陽郭德誼

簪紱何能貴聲名幸自脩凡今為我友幾半與君遊翰

墨千年托松梧一夜秋令人懷昔日炯炯夢丹丘

悼楊休甫

袖手旁觀一世餘元非親物亦非疎酒邊每事如人意
燈下通宵讀我書學到莊騷纔止此生逢周漢定何如
西州相識無遺恨獨恨無從摻子祛

挽宋巖老叅議

居然是是亦非非錯處稠中定不疑萬事過人旁袖手
一生從衆自觀頤肯為壯縣雖嘗試略見周行已逆知

盡日杜門佳客至小槽親校酒醇漓

少小修藏近市朝亦非着意混漁樵不為禦寇猶爭席
好說淵明更折腰一飯重違九子約千金終却故人招
送車幾兩交相唁我獨難忘最久要

悼劉謙之知錄

海內多吾友飄零今幾人相忘尤墮淚欲誅輒傷神

余欲

作景元同父祭文皆不勝悲輒止謙之亦然

才力矜餘地心期耻後塵溘然

無一語愁殺白頭親

挽王興之提刑

四海王詹事傳家有象賢宦情塵滓外風誼典刑邊遺
愛依前鄭羣居得少連生平纔樂此一夢涕潛然

悼濟陽夫人

久接江山境曾論子姓文於焉觀內則可以繼前聞榛
栗嚴賓豆蘋繁潔祀芬有人言不朽片石合磨雲

挽張春卿尚書

懷抱今遺直身名古象賢路車陳左塾笙磬在東懸再

世星辰上三年雨露邊崎嶇空老去有識共潜然
論建回天力生平與衆同居常焚諫草人自避乘驄朝
譽多張仲家聲近魯公挽辭吾不愧收入汗青中

悼翁仲立達州

憶昔看封事令人激懦衷邊籌皆破的硬語更盤空晚
亦通家好居然與衆同行藏嘗論定誰假一帆風

淮幙何多譽巴城僅一麾最書膚使上好語近臣知筆

路江山

一作烟雲

久維舟日月遲空懷歸報牘不逮勞還時

挽劉端木司戶

十年共語昨來非
長憶初年握手時
身世自憐心炯炯
功名猶恐論卑卑
民彝亘古非蕪沒
學者如公好罷資
緩轡徐行逢九軌
可堪倏忽九原悲

挽林致賢提舉

一經韋氏學五桂
竇儀家每耻鄉評
過深懲履道華人
方貴全璧事已墮
空花褒袞來黃閣
千年置齒牙

挽劉茂實和州

欲課民庸元道州欲評人品馬少游居無一事可切齒
薦有三公方掉頭送公歷陽令我愁目斷賓鴈書沈浮
識與不識涕淚流人世安用須封侯

鄉士大夫書說自明果然嗚呼悲夫自明為太學諸
生數與余游乾道壬辰同試進士自明不第於是始
別別三四年間自明以釋褐仕于朝而余之再至在
所也則自明寢貴絕出其輩行間相過語至其歡狎
悲壯與在學校時無異也余丞郡長樂會自明家居

待台州闕更數往來嘗造其所舍僧寺室中蕭然篋輿一乘老床幾數隻凡若干口日須婦翁米以為食而自明意象與在館閣時亦無異余每語人自明來日甚長也而今死矣自明言行焯焯在人耳目不但余能言之也余獨悲自明以喜事嫉邪取名於世而死最不幸好議論者曰是宜不良死也余觀自明立朝於進對苟得之間里廝役當諱而不以言上者具以情奏滿朝為危而自明雖即死不悔真若不受其

死者然其事母孝左右不敢違晚得師友務為靖恭
閒雅不苟坐立雖一飲茹亦必揣度無害乃下口余
嘗羨菌以進自明驚謂曰是可食耶往聞有食此死
者至今不近也自明可謂重其死矣士患無志有志
矣患不見知於上知而少不合輒不持重以究其用
亦士之罪也方自明以母老請外去非上意天下皆
以旦夕且復用自明又甚自愛而及於此何哉是不
謂之天耶故余為斯文也他不暇論於其死亟致意

焉以見余悲且以解議者之惑亦自明之志歟自明
長樂人姓鄭氏名鑑詞曰

母曰余兒兮吾莫知其何尤婦曰良人兮吾曷為罹此
憂兄弟不以是咎兮朋友稱其好脩恭不得其故兮庸
強名之曰命相彼下堂而貽戚兮或結纓以順聽萬不
同咸自取兮曾二者孰失其正聲鬼神之所仇兮人直
躬焉是病胥屬鏤忽墮其前兮屈魚腹以為穿竒禍作
於牖下兮顧奚悲而宜慶嗟子何傷兮獨余懷不能以

自勝尚或相爾貌孤兮天終焉其有定

止齋集卷九

欽定四庫全書薈要卷一萬五千八百九十五

集部

止齋集卷十

宋 陳傅良 撰

內制

慶元改元詔

勅門下朕以眇身託于兆人之上惟日兢兢懼無以紹
列聖之休而對揚上皇之慈訓也永惟當今之務何
者為急非欲百官脩輔而民力裕歟夫親君子遠小人

慶歷元祐之所以尊朝廷也省刑罰薄稅歛慶歷元祐之所以惠天下也是曩是訓歷年彌長肆于中興舉偏補敝皆於此乎取法克至今日中外又寧朕幸蒙遺業繩祖武而敢一日忘此乎掇取美號於紀元詩云不愆不忘率由舊章蓋庶幾周成焉其以明年為慶元元年故茲詔示想宜知悉

哲文神武成孝皇帝梓宮啓攢塗

奏告祝文

伏以兩楹啓殯六引徂東欲奉仍几之神以即因山之吉敢先虔告用冀安行尚享

啟攢畢梓宮還殿

皇帝行祭奠禮祝文

伏以厭世上賓終天永歎撤攢塗而即吉罄薄海以攀號酹奠雖虔瞻言何及尚饗

發引前一日初更總護使行夜祭祀祝文

伏以三年之制念在終喪七月有期忍當明發共脩祭

事曷究哀悰尚饗

發引前期祭告錢塘錢清江龍神祝文

伏以於昭烈祖將祔思陵方六紼之間津維大川之借
助用伸忱請尚冀明聽尚饗

發引遷奠祝文

伏以仰止龍輶臨于丘隧方少須於筮日庶永妥於賓
天昭告何云哀摧罔極尚饗

掩攢前一日奏告

昭慈聖獻皇后 徽宗皇帝 顯恭皇后

顯肅皇后 顯仁皇后 高宗皇帝

憲節皇后攢宮祝文

伏以思皇烈祖往祔諸陵當復土之及期願在天之垂
祐不震不竦以永萬世之藏來燕來寧如同一堂之上
尚饗

掩攢祝文

伏以遣車攸屆復土維新竟藏橋冢之衣冠莫覩堯天

之雲日永懷弗及隕越何勝尚饗

九虞祭祝文九

一虞

伏以稽山仰止想祖烈之攸宣清廟肅如悵神游之未
祔於茲易奠何以勝哀尚饗

二虞

伏以廡衣安在曷堪丹旆之思虞凡是憑尚系羨牆之
念道周之薦海內如摧尚饗

三虞

伏以亘古永違貽孫謀之如在自今始吉嗟孺慕之何窮三薦既陳長號罔措尚饗

四虞

伏以信信宿宿暫安於神棲子子孫孫永懷於祖武方舟而濟有淚如傾尚饗

五虞

伏以維堯傳舜俄同閔於衣冠自越入吳迺獨還於嬰

衛望如弗及哀曷能勝尚饗

六虞

伏以念慈皇祖忍當昌歎之陳瞻彼昊天痛極胡髯之
逝恭迎仗衛疑對音容尚饗

七虞

伏以濤江限斷嘗攝事於攸司郊次森嚴方飭躬於斯
薦扳依永已慟哭何云尚饗

八虞

伏以顧瞻橋冢已深萬古之藏想像衿衣尚御重華之
舊反虞將畢追慕窠新尚饗

九虞

伏以百神受職來奉於主車三后在天行升于祖廟哀
哉永訣忍此終虞尚饗

掩攢畢謝土神祝文

伏以於皇烈祖來祔思陵允惟百神襄此大事敢忘答
貺更冀明聰呵護之虔永永無斁尚饗

安南國王李龍翰加恩制

敕門下朕宣室受釐言念梯航之遠揚廷孚號載疏綸
綍之恩以昭烈祖之宏謨以篤价藩之丕祉推誠順化
秉信守義奉國履常懷德謹度思忠功臣特進檢校太
尉充靜海軍節度觀察處置等使兼御史大夫上柱國
安南國王食邑一萬戶食實封三千八百戶李龍翰恪
勤厥服紹美于前克提千里之封勿替累朝之好霜露
所墜固同洽於至仁滄海不波蓋良繇於多助維時嗣

服有事合宮亦遐想於彌恭莫共陪於肇祀駿奔在廟
雖阻脩黼皐之儀旅實充庭嘗與備蕭茅之享肆盼新
渥爰廣舊封裒載藉之名言侈元勳之顯號於戲閔予
訪落疇在公助祭之勞嘉乃象賢謹與國咸休之度於
焉申錫其尚欽承可依前特進檢校太尉充靜海軍節
度觀察處置等使兼御史大夫上柱國安南國王加食
邑一千戶食實封四百仍加濟美功臣散官勳如故主
者施行

賜徽猷閣學士太中大夫知襄陽府張杓辭免
改差知建康府恩命乞在外宮觀不允詔

勅具官某省所上表辭免恩命事具悉爾獨不聞故國
世臣之說乎而來諗疾也夫保墳墓孰與成先正之美
休祠館孰與圖累朝之報智者當有所擇矣式遙其驅
母事多遜所辭宜不允

賜文武百寮宰臣趙汝愚等上表請皇帝還內
不允批答

省表具之朕遭家多難懍乎懼不足以當大事賴天之
靈宗廟之祐迺者壬寅獲與同軌祔烈祖於思陵而遣
車徂東虞主未返仰止稽山明發不寐皇皇望望未知
所為也公卿百辟其何以慰朕而欲徇故常之請還廣
內乎方將稟命于上皇以供養仍九虞侍兩宮為事所
請宜不允

賜趙汝愚等再上表請皇帝還內宜允批答

省表具之夫會朝之囂謹非所以示下宿衛之暴露非

所以持久朕豈不熟慮此歟但以任如之養未忍違離
阜陵復土盍亦宿留是用却前請而勿聽也今承命三
宮皆曰不可百辟卿士又懇懇以為言朕惟捨獨見以
從衆允徇大權而勝私誼自古后王鮮不由此顧如冲
人其敢拂親尊之意抑臣庶而弗省乎所請宜允

止齋集卷十

欽定四庫全書薈要卷一萬五千八百九十六

集部

止齋集卷十一

宋 陳傅良 撰

外制

自紹熙四年
正月以後

皇后歸謁家廟親姪忠訓郎閣門宣贊舍人幹
辦軍頭司李孝純武經郎帶御器械幹辦皇城
司李孝友各特轉右武郎

敕具官某等朕惟古后妃有求賢審官之志而不私謁

而人主則特隆於肺腑之親夫惟后妃彌遜人主彌恩
斯可觀已日者吾后省家廟爾某皆以猶子祇服厥事
朕何愛一橫行郎而不以寵汝惟無忝爾祖以長守富
貴則予汝嘉可

皇后親姊故任武節郎閣門宣贊舍人致仕霍
漢臣妻平涼郡夫人李氏封成國夫人故任武
經郎致仕馬煥妻安化郡夫人李氏封信國夫
人忠訓郎某士廉妻彭原郡夫人李氏封崇國

夫人

敕朕惟古后妃有求賢審官之志而不私謁而人主特
隆於肺腑之親夫惟后妃彌遜人主彌恩斯可觀已具
位某氏夙以洙惠友于坤儀日者翟車還省家廟越來
相事禮無違者其益湯沐視君夫人尚服寵榮以綏壽
祉可

皇后親姪孫承節郎李瑜李粲各轉兩官

敕具官某等日者吾后還省家廟朕循故事推恩后族

自尊及卑罔或遺者尔以幸會爰進二階豈不榮哉尚
務靖共以綏爾祉可

皇后親姪婦故忠訓郎贈文州刺史李斌妻安
人潘氏右武郎帶御器械幹辦皇城司李孝友
妻安人趙氏親姪女通直郎充點檢贍軍激賞
酒庫所幹辦公事韓松妻安人李氏並特封恭
人親姪孫孫女右武郎帶御器械幹辦皇城司
李孝友女孺人李氏特封安人

敕具位某氏朕惟古后妃有求賢審官之志而不私謁
而人主則特隆於肺腑之親夫惟后妃彌遜人主彌恩
斯可觀已日者吾后省家廟爾以猶子實來相禮朕嘉
與之用益汝封尚服寵榮以無違我齊家之化可

皇后親姪女夫通直郎充點檢贍軍激賞酒庫
所幹辦公事韓松特轉一官

敕具官某日者吾后還省家廟朕循故事且酌有司之
議推恩后黨而爾來自動闕雅有能稱眷在甥館亦與

幸會至於增秩豈不榮哉尚務靖共以綏爾祿

皇后親姪女之子從事郎韓大用大任各循兩
資

敕具官某朕惟古后妃有求賢審官之志而不私謁而
人主則特隆於肺腑之親夫惟后妃彌遜人主彌恩斯
可觀已日者吾后省家廟爾等迺以諸甥亦與幸會例
進兩階豈不榮哉尚服寵章無忘忠報可

皇后親屬進武校尉韓大有將轉承信郎

敕具官某日者吾后還省家廟朕循故事且酌有司之
議推恩后黨而爾以諸甥亦與幸會例進一階豈不榮
哉尚服寵章無忘忠報可

皇后閣提舉官武功大夫帶御器械楊舜卿轉
觀察使

敕具官某等方周盛時后妃永懷賢士大夫僕馬俱病
而不敢私謁於上徒欲為觴酒勞苦之而竟不可得慨
嘆而已爾服勞宮閭迺以吾后有事家廟之恩至將廉

車豈不榮哉而槩之周人何其幸也尚服寵章無忘忠報可

皇后幹辦宅從義郎張友直忠訓郎沈直各特轉一官

敕具官某等朕酌有司之議推恩后族而及其私人爾等適與幸會各進一階其尚恪恭毋替爾事可

隨龍脩武郎閤門祇候兼皇后閤主管進奉袁佐額內翰林醫官太醫局教授王良佐成安郎

陳翊額內翰林醫官郭儀忠訓郎幹辦人船伊
昱忠訓郎主管文字傅昌時忠訓郎掌牋奏劉
玘忠翊郎主管進奉周良臣成忠郎掌牋奏黃
允文隨龍成忠郎浙西安撫司準備將領主管
進奉趙友信成忠郎私名掌牋奏吳衍保義郎
王寧費師旦承信郎陳琪承信郎轉運司準備
差使王演承信郎魏嘉言承節郎薛拱承節郎
幹辦人船李被進武校尉私名掌牋李大受該

遇皇后歸謁家廟並特轉一官

敕具官某等日者吾后還省家廟朕循故事且酌有司之議推恩后黨而及其私人爾等各以幸會至於增秩豈不榮哉尚務肅給毋怠其事可

東義郎韓侂冑特授閣門舍人

敕具官某朕永惟舊相有勲勞於我家而其裔孫或蒙戚里之澤越在右階無以著見唯是試之後省以發其文官之上閤以華其選尚庶幾焉爾其懋哉用俟明陟

可

皇伯太師嗣秀王伯圭合得冠帔一十五道並
特換封孺人賜親屬內欲將一名與故妻秦國
夫人妹宋氏封孺人

敕某氏古者疇勲賢之勞則及其私人況所尊敬自吾
壽皇以兄禮之者乎況其君夫人父之同產子乎以其
貤恩爵為命婦雖過於惠朕何愛焉可

閣門宣贊舍人游恭特授武德郎落閣職權發

遣臨安府兵馬鈴轄

敕具官某爾男爵也習於階兼之儀而不閑軍族之事
非設官之意矣第其久勞優以增秩試移賓政往治戎
韜其務赴功以須器使可

起復武功大夫文州刺史興元府駐劄御前右
軍統制兼知鳳州郭諤特轉復州團練使令
再任

敕具官某朕以禁旅扞邊而擇將以撫馭之閱歲云久

西顧晏然方眷其勞就進戎團之峻尚難其代故遲爪
戍之更爾其茂對新恩踐修舊績或嚴或律兼緝郡條
朕不汝忘將有明陟可

皇兄沂州防禦使權王奉吳王祭祀多才磨勘
轉明州觀察使

敕朕崇長宗支以綿帝繫高爵厚祿宜與共之而猶計
歲課勞循次而進所以昭至公謹成憲也具官某信厚
以為質靖共以自將入不恃家人之恩而出無違於闕

庭之禮況以尊屬于今幾人則徑陟廉車誰曰不可而必中有司之度積十年然後進之豈朕有所愛哉然而身無吏事之責秩比法從之崇其視匪躬盡瘁沒齒下僚者又何其幸也宜對殊渥無忝所生可

武功大夫和州防禦使權知閤門事兼客省四方館事韓侂冑特與落階官臣寮繳奏特與轉行右武大夫

敕嘉祐治平之間爾先正可謂社稷臣矣肆列聖寵嘉

之施及子孫簡在戚里於焉尚主於焉納后凡可以熾
韓氏之門者無愛也具官某蚤以才稱荐膺器使庀職
上閤宣勞累年唯彼橫行賞典所吝獨以命汝庸示殊
恩一以懽慈福之心一以大忠獻之後蓋亦自勉庶穆
羣言可

武功大夫集慶軍承宣使入內內侍省副都知
張安仁除入內內侍省都知武功大夫祁州團
練使入內內侍省押班李彥正除入內內侍省

副都知

敕具官某朕嘗稽之周制內宰隸於天官夫古道誠未
易復也至於建隆舊章尚有宣徽院之籍今亦廢矣而
別為北司則為之長者顧不當謹擇其人乎是用命爾
以肅禁中蓋親近之久識察之詳矣其益靖共以身率
屬毋使外廷謂汝不稱可

武功大夫和州防禦使帶御器械于惟脩武功
大夫明州觀察使帶御器械楊舜卿並除入內

內侍省押班

敕具官某自宣徽院之籍廢而北司之長益難其人朕
既差擇之矣則參伍其間以相內治苟不有以自異於
輩行而識風指謹憲度者皆不在此選也然則爾名在
四人之數盍亦思報稱者哉可

張祐正係隨龍祇應勤勞特補承信郎

敕某日第攀附之勞而偶遺汝益累年于此矣爰詔有
司授之初官以見朕懷不忘疇昔可

武節郎御前祇應鄭孝友應奉有勞特轉一官
敕具官某服勞左右雖無顯庸閱日進官亦國之舊可
殿前指揮使左班年代上名劉成等十五人授
脩武郎許元等三人授訓武郎御龍直上名方
正等三人授忠訓郎殿前指揮使左右班守闕
行門蔣榮十三人授從義郎東第一班上名婁
勝四人授承節郎散直上名孟端等七人授承

信郎

敕某等饗衛士而遣之古也而命以官則彌恩矣往祇
吏職毋替忠勞可

皇弟右監門衛大將軍復州團練使多助皇弟
右監門衛大將軍成州團練使多能實及一十
年並該磨勘轉防禦使

敕具官某等朕崇長宗支以綿帝繫而猶計歲課勞循
次而進所以昭至公謹成憲也以爾靖共簡在近屬眷
焉增秩誰曰不宜而須暇十年以中有司之度豈顧有

所愛哉以此風厲則為士者勸矣可

入內內侍省東頭供奉官降授寄資武功大夫
遙郡刺史霍汝翼轉歸吏部除帶御器械

敕具官某自以諸司使改令寄祿官而內侍與戎行雜
矣然而名不在銓曹之籍則猶非秩官是則異焉耳轉
而屬銓斯為寵渥爾其敬哉毋曰序進可

招箭班殿侍嘗彥澤在班及十五年補承節郎
仍舊存留在班祇應

敕具官某方罷遣衛士而次第官使之爾以藝成令祇舊次宜益矜舊以須後思可

瀘州軍變守臣張孝芳被害特贈三官與兩子恩澤

敕具官某朕觀春秋書盜殺某人夫謂之盜則非死者之罪矣蓋喟然歎曰士大夫或死於不幸而無所歸咎者焉則其所遭之變非必有以取之此仁君之所務白也國家閑暇士馬飽逸受命分閭尊重難危而爾曾無

咎端獨罹不測之禍夷攷其治皆率故常則盜起帳下
非春秋之所不罪者歟雖然世無叛兵久矣庸人為將
高枕有餘爾以名流顧至於此恤典之隆豈但汝哀亦
以使繼今者之知懼焉可

瀘州被害官兵故節度推官杜美贈兩資與一
子下州文學故忠訓郎瀘州駐泊兵馬監押安
彥斌贈三官與一子承信郎故下班祇應漳州
府鈐轄司指使雷世忠贈承信郎

敕具官某等苟能効死於其長上皆忠孝之徒也瀘盜之興爾等義不顧身各死於帥恤典之厚朕豈有所愛哉可

儒林郎前瀘州安撫司幹官郭仲傳失覺察本廳虞候張信為亂首亂作復與賊宴飲相為賓主特降三資放罷

敕具官某帥死于亂卒而爾為屬顧欲以卑調自全可乎削之三階尚用中典繼今有耻亦豈汝棄可

太史局測驗渾儀刻漏所學生周奕特補挈壺
正

敕某今官類非古稱謂而挈壺氏見於周官爾以諸生
馴致於此亦宜知所職矣可

脩武郎閤門省班祇候霍寬夫供職實及二年
與落省班二字

敕具官某課其年勞正其名稱非徒以叙遷也由是而
釋煩辱之事則宜知自貴重矣可

禮部侍郎倪思該脩至尊壽皇聖帝聖政特轉

一官

敕昔者仲尼序書斷自二典以為堯舜揖遜之義後世弗可及矣矧惟我家父作子述不待倦勤親相授受蓋視帝者有光焉則聖政之作豈不足以匹休虞書哉具官某以折衷六藝之學發明心傳以同風三代之文揚厲治効作宋一藝垂之無窮及此奏篇朕為之序日上慈宸壽皇嘉焉藉使仲尼在宜如何表異之而有司以

故事第賞爰進一官此朕之所甚不愛也可

秘書省著作郎黃由沈有開著作佐郎李唐卿
王容太常丞兼國史日歷所編類聖政檢討官
章穎將作少監黃艾並該脩進至尊壽皇聖帝
聖政內黃艾係經脩不經進各特轉一官

敕具官某等昔者仲尼序書斷自二典以為堯舜揖遜
之義後世弗可及矣矧惟我家父作子述不待倦勤親
相授受蓋視帝者有光焉則聖政之作豈不足以匹休

虞書哉爾等各以名儒載筆東觀作宋一藝垂之無窮
及此奏篇朕為之序日上慈宸壽皇嘉焉藉使仲尼在
宜如何表異之而有司以故事第賞爰進一官此朕之
所甚不愛也可

承信郎監潭州南嶽廟徐靖忠訓郎祕書省書
庫官盛端友訓武郎監祕書省門梁周弼翊郎
趙章該進至尊壽皇聖帝聖政各轉一官

敕具官某皆賞典也而他以待煩辱之勞至以隸書局

進官則稍寵矣爾尚勉思無忘忠報可

武功大夫降授昌州刺史帶御器械霍汝翼該
進至尊壽皇聖帝聖政特轉成州團練使

敕具官某鉉槩之勞繫學士大夫力也而無人乎其間
則安能關乙夜之覽今也奏牘來上俞音不遲慈庭有
懌冊府改觀是誰之助歟則以爾靖恭實與執事通達
中外其勞實多夫以文字得官皆德賞也進之遙刺孰
曰不可其尚勉思以稱殊渥可

宗正少卿鄭汝諧奉使回侍轉一官

敕具官某爾以老師宿儒銜命萬里脩隣好於北庭縉紳往往憫勞汝矣朕觀春秋使聘之際楚人欲傲晉叔向以其所不知而不能晉人亦曰鄭子產博物君子也而皆異其禮有以大國而微老師宿儒專對四方非所以令遠人見也迨茲歸報亶焉無闕而書勞進秩但循故事豈朕所以相勞苦之意哉爾其少休嗣有寵數可閤門舍人兼皇子嘉王府內知客譙令雍奉使

回特轉一官

敕具官某擯上閣之儀聯朱邱之事皆華選也爾以趣
操文藻至於共二可謂吾親臣矣是用命爾介于星使
銜命萬里脩歲聘於北庭迨茲歸報亶焉無闕則朕所
以相勞苦之意何但循故事增秩哉有它掄用朕不汝
忘可

奉使親屬一員淮東安撫司幹辦公事譙令憲
准備差遣一員新監明州贍軍酒庫黃仁裕書

狀官一員新明州昌國縣主簿楊正臣指使將仕郎葉時中將仕郎鄭如等回程各轉一官

敕具官某等凡出疆者有賞所以勞苦之也爾隸使事與於驅馳迨茲歸報書勞進秩蓋國舊章朕豈汝吝可閤門宣贊舍人宋克俊夏允言閤門祇候蔡唐卿來處恭並該應舉人使十次賞各轉一官

敕具官某等贊儀上閤能與聘客周旋十不失一亦既勞矣課効增秩蓋國舊章尚益靖共以須器使可

浙江潮神順濟廟善利侯祈禱感應特加忠靖

二字

敕某神朕固不為祕祠專鄉其福也至四方長吏有為
吾民請曰某山川之神能惠其境中則褒崇之典朕靡
愛焉以庶幾古蜡百神之義矧惟濤江近在寰內而有
司以報禮未稱將侈大之用錫美名以從民欲神尚終
惠使世世享可

袁州仰山神特加父母妃施子婦封號

敕某神等朕固不為祕祠專鄉其福也至四方長吏有
為吾民請曰某山川之神能惠其境中則褒崇之典朕
靡愛焉以庶幾古蜡百神之義惟仰山之神禮以王祀
而自江以西猶未慰滿是用推本父母施及子婦或隆
品秩或行稱號朕所以寵嘉神貺以從民欲者如何哉
尚終惠之俾世世享可

知平江府沈揆奏五龍靈濟廟乞加封第一位
龍王封東靈侯第二位龍王封西侯第三位龍

王封中侯第四位龍王封南平侯第五位龍王
封北寧侯

敕某神等朕雖不令祠官祝釐專鄉獨羨至四方長吏
有為吾民請曰某山川之神能惠於其方則褒崇之典
朕靡愛焉以庶幾古蜡百神之義矧惟五龍以時節雨
暘功著近甸雖良二千石雅不言機祥而具道所以然
之故文詞爛焉爰錫命書秩以侯爵則所以寵嘉神貺
以從民欲者何如哉尚終惠之俾世世享可

懷安軍金堂縣進士黎崇禮年一百三歲遇大
禮恩特補迪功郎致仕

敕某昔在元祐合祭于園丘之歲而汝以生於今五朝
矣朕方奉觴兩宮為萬歲壽廼如高年甚心羨之爰因
郊賚登諸仕版以見吾貴老近親之意且以教天下之
孝也可

翰林醫愈充重華宮擺鋪軍兵醫治兼臨安府
駐泊省醫邢守中到官及二年轉額外翰林醫


痊

敕具官某天官之属六十而醫命士二十有八人周家之重醫也如此再歲無失爰進一官此又吾家法也往服明恩毋怠爾事可

止齋集卷十一

謹案卷十一第四頁前六行方周盛時刊本周訛
用今改

第十三頁前一行禮部侍郎倪思刊本脫禮字据
宋光宗紀增



總校官庶吉士臣張能照

校對官檢討臣王鍾健

謄錄監生臣孫起鵬

欽定四庫全書薈要

集部

止齋集卷十三



詳校官助教臣謝登雋

欽定四庫全書薈要卷一萬五千八百九十七

集部

止齋集卷十二

宋 陳傅良 撰

外制

正議大夫守給事中兼侍講尤袤除禮部尚書

兼侍讀

四年正月十一除禮書三月二十日兼侍讀二詞併行

敕方朕在東宮時嘉與僚友切磋經誼緝熙光明肆以
菲躬託于兆人之上克奉詒謀庶幾寡過永懷三益宜

如之何具官某博極群書折衷六藝凡與我言者於今
不忘也憫勞瑣闥位之春官進讀路門以竟餘論昔者
甘盤輔高宗於舊勞之時而無與於中興納誨之選至
漢二疏同傳太子而亦不在初元疇功之詔我有故人
始終典學視昔蓋有光焉爾其輔養精神陳古以誠今
惟母以謝事之年而有遐心則朕以懌可

朝散郎試中書舍人兼皇子嘉王府翊善黃裳

除給事中兼侍講

四年正月十一日除給事三
月二十一日兼侍講二詞併

行

敕朕有元子出就外傳敷求其人益累年於此矣晚得
三益聰敬日聞間嘗侍燕從容能道二南之化朕嘉其
勞圖以自近具官某習先聖之術而於當世之務凡與
吾見切磋言之者皆實學也是用擢之瑣闥勸講路門
冀發其蘊并以告朕昔四皓調護太子而不屈於高帝
李泌以布衣交肅宗而不能安其身於君側爾以西州
之彥出入宮邸為父言慈為子言孝是不謂之遭時乎

尚其殫竭以報簡知可

降授朝散郎許及之前任淮東轉運判官不覺
察禁錢降一官滿一期復朝請郎

勅某官日者淮錢多姦禁不以道有受其咎者矣爾其
以同過之仁而不言上亦從鐫秩非所謂吏議乎閔日
既久宜還其初可

忠翊郎前韶州兵馬監押周昇在任不法降成
忠郎

敕具官某爾為兵官而州家以佚累囚來諭雖會思不
汝貸也其鑄一階以警慢事可

文林郎階州將利縣令蘭森改初驗因傷身死
人杜十四作凍餓身死失出犯公罪答該赦取
旨特降一資

敕具官某吏與吾民親莫如令爾尚不知其冤死也而
以為道殣曾謂與吾民親乎其鑄一階毋以恩免可

保義郎李珙家遺火燒民屋四百餘間有司自

來以屋直計贓坐罪得旨宣諭依條聽贖臣僚
上言特降一官

敕具官某傳春秋者有人火之說則無所歸咎之辭也
爾不戒于火而禍及於閭巷將安咎乎尚爾闕略其上
一官可

故通直郎趙公廣昨知饒州因旱歉民流臣寮
奏追兩宮勒停男彥俊訴寃特追復承議郎

敕具官某左右諸大夫之言朕知其不如國人也爾守

畚中遭歲不淑能有惻隱之實而不為文具而達于朝
聽者皆反繆言者不置麗于佚罰而爾既賁恨於地下
今觀闔郡連編累牘哭汝甚哀蓋棺論定莫公於此朕
為憫然盡還舊官不但慰汝亦以勸來者之勤民也可
江西運副鄭汝諧奏奉議郎知袁州黃劭丁母
憂不肯離任倍支棺櫬喪服官錢等候服闋日
降一官不得與親民差遣

敕具官某爾嘗將母以就二千石之養垂及滿歲竟以

喪歸漕臣見劾侵紊郡計姑鑄一秩俾務省循尚益前
愆朕豈終棄可

承節郎盱眙軍指使潘撫權淮河監渡不職降
一官放罷

敕具官某違禁之嚴而弛於汝免官鑄秩以警後來邦
憲有常非我佚罰可

淮東運使趙師瓘奏脩武郎張世榮管押歲幣
沿路恣橫生事降兩官送吏部與合入差遣

敕具官某發幣於邊事關遠聽紛譁不靖使者有言閭
略弗懲人將是儆其貶兩秩且屬銓曹庶使邊臣繼今
知懼可

湖北提刑張垓奏承議郎常德府通判趙善彥
在任貪婪不法降一官放罷

敕具官某部使者所治且有良二千石焉爾丞郡顧不
以治行聞而速官謗非朕所以獎用屬籍之意矣其貶
一秩免所居官繼今有耻亦免汝棄可

知成都府丘寔奏奉議郎知成都府郫縣郭公
謩病昏乖謬降一官放罷

敕具官某夫不能勝其任矣而昏於酒黷於貨然而郡
太守猶以為嘗有鄉曲之譽不寘于理鑄秩免官吾亦
從薄罰焉其對隆寬益思懲艾可

睿思殿祇候寄資武功大夫入內內侍省東頭
供奉官王師珪轉歸吏部差在京宮觀免奉朝

請

敕具官某自以諸司使改今寄祿官而內侍與戎行雜
矣然而名不在銓曹之籍則猶非秩官是則異焉耳轉
而屬銓斯為寵渥閔勞朝謁祿以真祠爾其敬哉毋曰
序進可

武功大夫祁州團練使入內內侍省副都知李
彥正武功大夫明州觀察使入內內侍省押班
楊舜卿職事不謹各降一官

敕具官某等朕惟周制內宰掌王內之政令會其屬之

功事而賞罰之今內宰不設而爾等不虔于事實于宮中之罰其上一官應古經誼繼今有悛亦豈終奪可

李彥正楊舜卿復

敕具官某有過無大況其細者乎爾以服勞不虔嘗麗于罰蓋八柄所以馭過者閱日滋久俾還舊官則予恩茂矣其益靖共以圖報稱可

入內內侍省副都知李彥正除入內內侍省都知入內內侍省押班楊舜卿除入內內侍省副

都知

敕具官某昔在周制內宰以中大夫為之而隸天官說者以為禁省之祕不宜屬外廷而本朝爰初北司之長就擇明習靖共可以率屬者以董正之官最貴近亦不可不重其選矣爾自輩中進在四人之數曾未踰日能贊內治進之長官楊舜卿六進亞長官委寄彌重其益虔匪懈以報殊渥毋使外廷謂汝不稱可

親衛大夫清遠軍承宣使提舉佑神觀林憶年

除入內內侍省押班

敕自宣徽院之籍廢而北司之長蓋難其人朕既差擇之矣則參伍其間以弼內治非識風指謹憲度者皆不在此選也具官某服勞禁近見謂老成茲用命汝秩在四人之數欲俾其屬於內肅給於外靖共則爾責重矣益亦思報稱者哉可

皇兄故吳王府奉利州觀察使多才上遺表妻令人高氏特封碩人

敕具位某氏朕所以賁爾夫於幽壤有加禮矣又何愛於䟽封爾使居住皆寵光焉以塞其悲念可

多才上遺表親第二人乞比換南班訓武郎多
藝修武郎多見並特授太子右監門率府率

敕具官某等朕以諸衛處宗室子俾日奉朝請非苟示私也以爾多才身後之請及其仲季惻然重違之而並命爾其務靖共以稱德意可

皇叔祖右千牛衛將軍不僂磨勘轉右監門衛

大將軍

敕具官某等朕考周官凡衛王宮者皆同姓也國朝簡宗英寘之環列之尹蓋循周制屬意深矣惟爾叔祖簡在衛中歷年彌長勞績兼茂進長禁闥職守益嚴欽哉無違以稱明陟可

皇叔祖太子右監門率府率不廷特授千牛衛將軍

敕具官某以階官易環衛率視其秩日者有司故貶損

爾今徹朕聞始仍舊貫雖曰緒正亦以示恩其尚恪恭
稱此密察可

武功大夫權主管侍衛馬軍司公事張師顏落
權字

敕具官某朕以金陵形勢襟帶江淮輟吾騎衛布之屯
所且以壯留鑰馬則統馭之才厥選艱矣爾以名將往
訓群騶方當無事士馬飽逸觀者咸謂可以即戎紆懷
武備於風駟鐵於雅車攻或庶幾焉翳爾之力肆用命

爾自攝為真班秩益崇寄任彌重其尚加懋以究爾功
俾周秦之詩得以專美則予汝嘉可

皇叔祖武德郎主管台州崇道觀不叡特換右
監門衛大將軍

勅具官某朕攷周官凡衛王宮者皆同姓也國朝亦簡
宗英寘之環列之尹益循周制屬意深矣惟爾叔祖行
尊德脩今在選中應于經誼宜率典常作宋恭先有馮
有翼則繫汝賴可

昭憲皇后親姪孫杜士寶特補承信郎

敕某朕惟藝祖之子孫自吾壽皇篤叙之恩備矣而於
母黨顧無世祿豈昌陵之意乎取之白丁授以右職爾
其永懷無忝所自可

右丞相葛邲初拜贈三代封妻

四年三月拜

曾祖朝奉郎致仕贈太師謚清孝追封魏國
公書思封魯國公

敕朕覽周誥至命君牙為大司徒實兼冢宰是謂股肱

而推本乃祖世篤忠正之美蓋有感焉維今大臣相我
孝治經文緯武海內晏然則亦惟其先德之休足以燾
後可無褒崇以應經誼某官故曾祖某躬行對於古人鄉
譽高於月旦方其筮仕亦既有聞而以其親掛冠再調
筦庫以此終身僅通閭籍法不應謚朝廷異焉易名清
孝足以發明其人矣燕及曾孫爰司宰事則所以推本
其美朕敢忘周道乎進封大邦莫如曲阜尚食其報永
綏爾神可

曾祖母魏國夫人侍其氏贈冀國夫人

敕周之盛至於既醉極矣其卒章曰君子萬年景命有
僕其僕維何釐爾女士釐爾女士從以孫子言周之群
臣皆有士行之女以為之妃使生子孫足以傳世蓋天
意也具官某故曾祖母具位某氏作配君子行修於家
覃及曾孫廼生者哲考其世次亦足以知吾祖宗盛時
天意攸屬而豈一日之積一門之私哉假使當周之世
必從夫爵侑食五廟然則昨以大國秩之小君雖古未

有亦可以義起禮矣可

祖宣奉大夫顯謨閣侍制致仕丹陽郡開國公
贈太師謚文康追封楚國公勝仲封齊國公

敕朕既本之六藝大啟土宇以宏賁葛氏之祧則嗣有
令聞逮事兩朝申錫名邦亦禮之稱具官某故祖具官
某服膺家聲踐脩累世濟以力學連由三科然而名滿
天下而位不過從班文字行於方來而身不究遠業惟
是一經之教被于聞孫蔚為名臣間我兩社則勛躬之

報可無異恩維此營丘太公舊宅是用即命以為新封
對我寵靈以昌爾祚可

祖母楚國夫人張氏贈夏國夫人

敕朕方廣念祖烈匹休於周假以溢我而收得賢之福
則所以尊大其家以答天貺豈顧有所愛哉具官某故
祖母具位某氏夙以懿行來嬪名家儀于前人以詔婦
子亦既再世赫然有聞而未艾之祥施于今相詩不云
乎樹之榛栗椅桐梓漆爰伐琴瑟種德彌遠歷年彌長

豈必皆身親見之乎報本醺勞式至今日大邦美號以
慰永懷非以為生蓋禮之稱可

父朝議大夫致仕贈太師許國公立方封越
國公

敕王室百年之間公侯將相故家希不失者有以文墨
論議綿及三葉是謂世臣固朕之所寵嘉矧予宗工尊
為禰廟者乎具官某故父具官某襟度粹然聲華藉甚
文未脫藁往往誦之一時英游莫敢輩行紹興之季歸

為從臣蓋其行藏皆可蹤跡用而不盡士論惜焉宜集
善聲發於賢嗣凡所著見孰非典刑爰侈舊封建邦於
越以厚教忠之報以伸追遠之懷可

母雍國夫人樊氏贈陳國夫人

敕為吾股肱之臣則上自三世皆褒大之而況於其母
乎御不及百兩養不及萬鍾也而無以慰滿其罔極之
恩亦何以責移忠之報哉具官某故母某氏承休
襲美發育自躬恩斯勤斯鞠我良弼雖及晏歲逮事舅

姑旦莫敬共至忘櫛類是足以成其子之令德矣改䟽
上國之封以世世配于祔廟而今而後庶幾吾大臣之
不廢蓼莪也可

故妻蜀郡夫人沈氏贈成國夫人

勅夫人起家以致爵位風人懼焉迺若克相夫子至於
登庸嘗與之同隱憂矣而不同休顯此則又禮經之所
悼嗟也具官某故妻具位某氏女德配於珩璜婦功著
於蘋藻胡不偕老以須美成朕惟吾相裸於祔姑之室

而副笄之服弗被翟第之車弗乘也非有追寵何以慰之乃闢新封以賁幽室可

妻魯郡夫人王氏封信國夫人

勅永惟二南大夫勞於王事而勉之以正勸之以義者皆其家室也矧吾輔臣孤立一意佐佑乃辟是不曰警戒相成之助歟具官某妻具位某氏自繼元配德音不瑕既有芳猷進畀祖妣亦有雜佩施及朋儔佐我名臣迄登三事聞譽日廣績用日崇則與夫汝水之墳南山之

側遭世不淑動心忍性者可同年而語乎冠於命婦為君夫人我有茂恩宜不汝吝可

知樞密院事胡晉臣初除贈三代封妻

四年三月除

曾祖贈太子太保修己贈少保

勅昔周宣中興將相皆天下之選矣爰命皇父以整六師而推本所以實南仲太祖之後爰作常武之詩朕甚慕焉維今本兵得我碩輔則其宗祧可無褒崇以應經誼具官某故曾祖具官某躬行對於古人德譽高於輩

行而懷道不試士論惜之夫屈於名者享其實不發乎其
身者遺其後是宜燕及曾孫蔚為名臣久陪國論晉
長樞庭則追錄其積行之勤增華其種德之報朕敢忘
常武之詩乎陞班亞保以寧其神非以為生蓋禮之稱
可

曾祖母濟陽郡夫人黃氏贈崇國夫人東萊
郡夫人張氏贈安南國夫人

敕周之盛至於既醉極矣其卒章曰君子萬年景命有

僕其僕維何釐爾女士釐爾女士從以孫子言周之群
臣皆有士行之女以為之妃使生子孫足以傳世蓋天
意也具官某故曾祖母具位某氏作配君子行脩於家
覃及曾孫迺生者括考其世次亦足以知吾祖宗盛時
天意攸屬而豈一日之積一門之私哉假使當周之世
必從夫爵脩食五廟然則昨以大國秩之小君雖古未
有可以義起禮矣可

祖贈太子太傅燮贈少傅

敕朕既本之六藝不愛高爵以崇報胡氏之祧則嗣有
令德休于後昆並命為孤亦禮之稱具官某故祖具官
某當天下之清得幽人之履世無孝廉之科而不偕於
計吏居無朝市之交而不聞於上國天命弗僭為之生
孫蚤為聞人遂專樞筦是不謂之勛躬燾後者乎申錫
命書班於次傳豈唯發潛亦勸來者可

祖母平原郡夫人王氏贈永國夫人

敕朕方寅念祖烈匹休於周假以溢我而收得賢之福

則所以尊大其家以答天貺豈顧有所愛哉具官某故
祖母具位某氏夙以懿行來嬪名家儀于前人以詔婦
子爰集慶善施于聞孫詩不云乎樹之榛栗椅桐梓漆
爰伐琴瑟種德彌遠歷年彌長豈必皆身親見之乎報
本醕勞式至今日大邦美號於禮為宜可

父奉議郎致仕贈太子太師宗贈少師

勅自蜀平至今二百餘年蓋西土無遺賢矣而尚有潛
德三世不逢詩不云乎何其久也必有以也具官某故

父具官某行著而晦於名才豐而嗇于位乾道之際有
子烺然諸老先生見謂公輔吾壽皇駸駸嚮用矣而方
考槃阿澗永矢弗諼不以鼎來之養而易燕居之福匪
棘其欲卒為帝師殆所謂有道者乎然而生則遂循墻
之志歿則極告第之榮吾於大臣之親亦質之詩書無
愧矣可

母通義郡夫人鮮于氏贈信國夫人和政郡
夫人蘇氏贈和國夫人文安郡夫人王氏贈

惠國夫人

敕為吾大臣則上自三世皆寵嘉之而況於其母乎御
不及百兩養不及萬鍾也而無以慰滿其罔極之恩亦
何以責移忠之報哉具官某故母具位某氏承休襲美
發育自躬恩斯勤斯鞠我良弼蓋副笄之飾翟裼之華
一朝疇之不以為泰朕惟樞輔怵然永懷是用䟽以上
國之封以世世配於禰廟而今而後庶幾吾大臣之不
廢慕我也可

妻大寧郡夫人康氏封安定郡夫人

敕永惟二南大夫勞於王事而勉之以正勸之以義者
皆其室家也矧吾輔臣孤立一意佐佑乃辟是不曰警
戒相成之助歟具官某妻具位某氏酒醪之所羞雜佩
之所贈皆天下賢傑也爰相夫子至於登庸經文緯武
績用甚茂則與夫汝水之墳南山之側遭世不淑動心
忍性者可同年而語乎冠於命婦為君夫人我有異恩
宜不汝吝可

迪功郎祕書省正字蔡幼學該脩進至尊壽皇
聖帝會要轉一官

敕具官某載筆東觀迄於成書序進一階可謂德賞益
修鈐槧以昌爾文二典三謨亦其選也可

忠訓郎武學博士李興時知融州

七月十三日

敕具官某簡在右學諸生咸曰賢哉吾博士也滿歲宜
遷官而自謂治民將以其淑人者施之行事融在嶺表
嘗建旌鉞而荆湖之與鄰視旁郡為善地爰以付汝是

謂異數尚其懋哉以踐爾言可

高文虎除將作監丞

敕具官某朕旁招俊彥布列周行德進言揚如恐不及
矧子大史氏之舊引疾居家十有四年昔病今愈子環
可後乎爾博學篤志承伯父之傳網羅舊聞述史遷之
緒採之公論僉曰汝賢再轉為丞尚居繕監職務清簡
可以卒汗青之業毋以匠為嫌也可

武學諭范仲壬除武學博士脩武郎黃裳然除

武學諭

並七月二十一日

敕具官某等國家設武科以取士有周道焉所以貫革
之射息說劍搢笏冕衣裳在西學則皆俊游也矧若爾
仲壬爾褻然人所亟稱者乎分以橫經之席從以滿戶
之屨雖甚寵異豈曰不宜可

止齋集卷十二

欽定四庫全書薈要卷一萬五千八百九十八

集部

止齋集卷十三

宋 陳傅良 撰

外制

和州防禦使殿前副指揮使郭杲除宜州觀察使

敕古者六軍皆以卿將元戎十乘有瑒葱珩二雅誦之庸示光寵矧我中權可無異數具官某鷹揚之勇輻湊

之謀山西將家今纔一二疇勞屯所晉長周廬訓我群
騶壯我中壘累歲於此士聽無譁日者貝冑三十來閱
庭內舍矢如破可以即戎朕圖爾功宜及懋賞枚數勇
爵峻極廉車禮均從班視古卿士是用命汝蓋周舊章
先對明恩益思忠報無使行狩專美車攻無使止居遺
恨祈父則予以懌僉曰汝諧可

武略大夫侍衛步軍都虞候兼權侍衛馬軍司
職事閭仲持轉右武大夫忠州刺史

敕日者朕重冬狩之役又不欲乏武事也而為簡之師
試諸廷內於環列得帥焉於步旅又得帥焉皆可以即
戎朕甚嘉之具官某久於行陣積有戰功枚數壯士莫
與儔伍解胸山之圍殿符離之返至今言之令人矜奮
須自遴選泣我師徒百夫千夫各習其教往往營壘廬
次之間無囂塵也於是閱也介冑堅好旌麾光明坐作
進退動中尺度朕惟勇爵以橫行為右階之最以刺郡
為遙領之始悉不汝吝用賞懋功其對隆恩益殫忠力

可

閤門省班趙弼奏祖故寧遠軍節度使侍衛馬
軍都指揮使贈太尉趙樽累遇郊祀登極未曾
陳乞加贈特贈開府儀同三司

敕朕永懷將閔克勤王家宣勞實多贈典有闕具官某
忠於許國勇不顧身能以衛社稷之心効於死封疆之
力戰自束髮觀者汗顏日者欲澄冗員嘗第元從閔實
數千人之衆定為十三處之功爾獨最聞朕尤嘉獎然

論報自昔雖峻極於武階而訟言有孫尚少虧於褒律
是用申命幽壤視儀上台以昭我不吝賞之功以成爾
無遺恨之美抑使介士奮於戎行可

朝散大夫權刑部尚書京鏜兼侍講

四年八月二十三日

勅朕與賢士大夫切磋經誼之日久矣而今加意於春
秋春秋固為夷夏作也蓋聞在漢或申復讎之義或庶
幾止戈之武而皆有大功號稱七制斷之經意孰得孰
失朕將安所取此而誰與茂明之也具官某簡在法從

蔚為名臣修聘北庭非禮勿聽往釐西事無言不酬
斯可謂據古而通今者矣進之路朝重席以待其為
朕深探遺經之指與漢二君行事以佐取舍爾信不
為章句學者而朕顧不能尊所聞歟往其懋哉以副
延佇可

太中大夫權尚書吏部侍郎沈揆兼侍講

八月二十

三
日

敕朕與賢士大夫切磋經誼之日久矣而今加意於春

秋春秋固為夷夏作也蓋聞在漢或申復讎之義或庶幾止戈之武而皆有大功號稱七制斷之經意孰得孰失朕將安所取此而誰與茂明之也具官某紹興諸生逮事高廟乾道博士見知慈庭於今士林鮮矣輩行而況嘗與朕游舊乎進之路朝重席以待其為朕深探遺經之指與漢二君行事以佐取舍爾信不為章句學者而朕顧不能尊所聞歟往其懋哉以副延佇可

朝請郎右正言黃艾兼侍講

八月二十三日

敕具官某諫臣朕所甚嘉與也迺者封囊朝奏而夕不
下則言者輒不自得豈朕意哉勸講闕員有司來諗庸
命汝父切磋經術晉陪從班無所降殺豈惟以爾聞見
博洽宜在選中亦使人人曉然知朕嘉與之意則繼此
盡言不諱矣尚殫厥心以副延佇可

湖南提刑孫逢吉奏邵州獄囚死者二十餘人
守臣湖澄持展二年磨勘

敕昔在三朝每歲盛夏以一札賜郡長吏為奸獄丁寧

也自長吏不奉此詔而吾民瘦死者滋衆爾某守邵亦以獄囚多死見察於部使者毋乃非朕寄元元之意乎貶損年勞以示薄罰繼此領州無怠臬事可

文林郎邵州錄事參軍柴璿脩職郎邵州司理參軍李邠獄囚多死各特降一資

敕具官某爾為獄官而不省囚疾苦至多瘦死非所謂士師不能治士者歟其鑄一階以警怠事可

大尉定江軍節度使興州駐劄御前諸軍都統

制兼知興州吳挺守本官致仕

敕圖任世臣盡護蜀將貔貅十萬不從中覆蓋五六十
年於此矣此意安在哉而欲致其事耶具官某性有忠
勇之資學有韜鈴之素寬我西顧賢於長城假以數年
庶底丕績而一旦以疾來諗願上夫將軍印綬此朕所
以屏奏不省也雖然誦詩至於勤歸勞還詠歎辛苦則
古者遣將數日即休未有以獨賢久勞若爾然者朕豈
得不動於心乎姑徇忱辭使自休養若屬有疆場之事

强為朕起何以報我爾其勿忘可

故太尉定江軍節度使興州駐劄御前諸軍都
統制兼知興州致仕吳挺特贈少保

敕朕誕膺聖緒渴想賢勞方分託重之權尚阻勞還之
禮眷惟三世每興西歸慨釜之懷胡不百年遽有東首
拖紳之恨可為震悼何以追榮具官某為今介藩視古
名將本之以鷹揚之勇濟之以輻輳之才越在江源而
不忘宗海之心既安蜀道而常為得隴之計是用倚以

大事付之全師永惟王室之中興皆有世臣而後濟維
周復古則召公是侑之功維漢御天則耿氏獨隆之力
期爾晏歲對于昔人曾諗疾之亡何而告哀之已至朕
方深念莫起於九原國有常儀率加之二等肆頒渙渥
以慰沉冥晉陪亞保之班配食先王之廟噫有以勇爵
至於聯左棘之華雖云愍章足以示前茅之勸可

持服前武功大夫祁州團練使吳曦特授濠州
團練使起復

敕具官某有金革之事則三年之喪無辟自伯禽以來
未之有改而況爾曦世為將乎移孝為忠朕所以強起
汝也又況蜀師十萬聽命爾家西陲晏然于今五紀方
圖前烈宜及後人則脫爾於寄祿之階授爾以戎練之
任豈以為利其母固辭可

提舉江州太平興國宮郭棣授利州觀察使致
仕

敕憫勞將帥畀以真祠尚復抗章勇於忘祿重違雅志

俾遂歸休爰進崇階以勸廉退具官某奮自將種卓有
俊聲荐更轅門晉尹環列累歲於此六軍不譁方篤邦
交久無疆事閩士雖倍戰功不多然中權屹然大敵知
懼繫卿之力簡在朕心所冀壯猷不忘王室胡為解組
遽此垂車豈非以行百里者末路之難而三世功名道
家所忌乎勉從忱請良弗眷懷尚服寵榮益綏壽祉可
故利州觀察使致仕郭棣特贈寧遠軍承宣使
敕聽垂車之請亦既永嘆聞易簣之言可勝遐想宜舉

恤典以醕舊勞具官某自束髮之初有褻尸之志方其
賈勇於宣威沙漠之間竟爾收聲當偃伯靈臺之後然
而我有萬乘如周畿兵我有千廬如漢中壘舉以副托
究其設施歷年彌長課効為最往者以厭直之請踐更
于邊雖分州符亦以寄重反即祠館從其憚煩曾鳴劍
之未酬何挂冠之已決朕方有感德非忘杖杜之詩今
顧不然乃是迫桑榆之景覽此遺奏為之盡傷爰錫使
名視唐留務以華身後蓋國舊章其尚欽承用自寬慰

可

武節大夫致仕

敕有能厭戰爭之習蹈不測來歸我可謂壯士矣胡為
諗疾欲自便乎具官某耻事朔庭義不攜漢觀光中國
誓將滅戎益壽皇之所寵嘉而朕待之勿替者也夫鳴
劍之志未酬而挂冠之請已決豈其以兩國方歡賈勇
不售將退處以自娛暇乎抑膂力既愆自視非昔人而
不復感槩然也不然果疾病耶重違忱請聽致爾事若

以疾辭則豈庸釋可

武節大夫贈官

勅挂冠有請良惻余衷華壙有恩蓋綏爾後具官某以
幽燕任俠之氣懷江漢朝宗之心萬里來歸甚欲宣威
於沙漠而兩君為好適當偃伯於靈臺竟爾收聲至於
賁恨益聞荆蠻之僭春秋所嚴有能擇衣冠於介鱗之
間而顧執干戈於社稷之役眷此壯志令人永懷爰疏
錫命之封庸示飾終之典尚歆殊渥以安英魂可

正議大夫充顯謨閣待制提舉江州太平興國
宮陳峴磨勘轉正奉大夫

敕夫循次非所以待勞能也計年非所以處法從也而
有司以告重違舊章宜有命書且見明陟具官某以名
臣之子自託於儒生以夕郎之官踐更於州組奉祠累
歲益見靖共序進一官曾非特典朕不敢廢姑慰永懷
可

合州赤山縣多山至道觀中妙真人祈禱感應

加封冲妙靈應真人

敕具某神朕雖不令祠官祝釐專鄉獨美至四方長吏
有為吾民請曰某山川之神能惠其一方則褒崇之典
朕靡愛焉以庶幾古蜡百神之義今蜀部使者來言爾
神惠及闔境求之掌故則建炎之所表章也爰錫命書
申衍稱號所以寵嘉神貺以從民欲者何如哉尚終惠
之俾世世享可

潼川府中江縣靈威廟善利侯祈禱感應加封

善利敷濟侯

敕具某神朕雖不令祠官祝釐專鄉獨美至四方長吏
有為吾民請曰某山川之神能惠其一方則褒崇之典
朕靡愛焉以庶幾古蜡百神之義今蜀部使者來言爾
神惠及闔境肅然古祠前脩所敬吾民其嘉賴不忘也
爰錫命書申衍稱號所以寵嘉神貺以從民欲者何如
哉尚終惠之俾世世享可

盱眙軍通判

闕

降一官

敕具官某爾為通守適掌北門之管姦民犯禁而莫之
禦顧欲歸罪於徼吏可乎其鑄一秩以為不事事之戒
可

武節大夫權發遣郢州任世安特轉一官再任
敕具官某往時三邊吏不數易滿歲無虞則增秩以寵
之蓋自建隆以來未有改也今爾乘障日有能聲爰進
新階仍紆舊組爾其益固吾圉以訖外庸杜勤歸之
詩朕豈忘之乎可

從義郎權知思州田祖嚴特轉一官

敕具官某昔爾以歸地進秩而有司繆誤仍年勞之舊
貫於焉正名以示懋賞其服今命益見寵綏可

履正大夫奉國軍承宣使提舉佑神觀鄧從訓
主管國信所任滿無違闕特授宣政大夫

敕交鄰之禮於今為重自東帶與賓客言至於凡執事
皆所以覽示遠人以中國之有體也具官某昨長內庭
常發贄幣竟以明習曾無忒違隣好不渝亦繫爾力壽

勞滿歲懋賞崇階蓋國舊章朕豈汝吝可

朝散郎守司農少卿詹體仁除太常少卿

十月三日

敕具官某奉常惟禮樂是司而去古浸遠放逸尚多非
得博物洽聞學有根據者未易輕畀也爾少明經術務
為有用探賸索隱耻一物之不知總餉之久蓋已由郎
省而貳大農矣召對雍容効忠無隱其為朕典禮樂之
事鍾鼓玉帛抑末也尚求其本而釐正之可

朝散大夫尚書戶部員外郎趙謐除軍器監兼

權郎中

十一月十八日

敕具官某戎監之設本以嚴飭武備而休兵歲久繕脩之職各有司存長貳亦惟揔其凡而已以爾舊弼之孫克自抑畏久在郎省能寡悔尤序進為長仍攝民曹往其祇欽無替于舊可

朝請大夫起居郎兼玉牒所檢討官兼權中書

舍人樓鑰除中書舍人

十二月二日

敕壽皇初策在廷之士蓋極一時之選矣朕閱名籍得

為相臣者二人焉樞臣者一人焉從臣而下以聲績著
見者迨不可枚數也具官某於是時嘗褻然為舉首而
偶不中有司之度然至今海內士所樂道議論文章風
流蘊藉則未嘗不在稱首也間者旁招時望寘之本朝
爾以攝官屬筆能道朕德意與其人才美之所宜文字
之上下簡書之長短皆足用勸而僉言不同往往不奉
吾詔仁者之勇見於封章肆用命爾為直詞掖除書之
出國人皆曰賢詩不云乎假以溢我我其收之朕於是

蒙壽皇得人之福矣昔者鄭為辭命終屬國僑唐掌帝制實先韓愈爾其懋哉稱此優異可

額內翰林醫痊李九齡轉翰林醫効

敕具官某天官之屬六十而醫命士二十有八人周家之重醫也如此矧爾服勞有以自見進之二秩視周命士往服明恩毋怠爾事可

判太史局吳澤荆大聲劉孝榮周端友職事不
謹各降一官

敕具官某等東方未明之作挈壺氏所以刺朝廷也朕夙興待旦而五夜之漏聲不肅是誰之咎歟各鑄一官敬共朝夕母以為星官歷翁而弗汝察也可

秀州海鹽縣陳山龍王顯濟廟神母慶善夫人
加薦福二字

敕某神母朕既從二千石之言宏賁二子之祠維爾能與而子共福吾民郡人推本所自而廟食之可無寵嘉
申衍稱號以大慰民欲乎可

賜進士出身宣教郎趙善防係濮安懿王近屬
更轉一官

敕具官某策士于庭而吾屬籍有以文克列于丙科朕
既異焉而問諸宗人則於濮園為近抑可嘉已申命一
官以勸胄子爾其懋哉務自著見可

宗子顯夫量試不中年四十以上特補承信郎
敕某國家所以待屬籍至矣不得雋於進士則有量試
不得雋於量試則有免試皆欲使之齒仕版習吏事也

爾其勉哉以稱朕意可

量試中宗子汝弼等八十一人補官

敕某等凡有司考校之科甚嚴密也而獨寬於量試宗子蓋欲使之齒仕版習吏事稍涉於文墨而不求其備爾等盍對明恩思所以自勉哉可

合格取應宗子時信等四十二人授官第一名
補承節郎餘補承信郎

敕某等有司考試之法至嚴密也而獨優於宗室子夫

既闕畧以取之而授官與寒畯等則非所以示公姑屬
右銓以須器使可

四川宗子師說等十人赳赳殿試不及並特補
承信郎

敕某等爾以宗黨越在西州嘗得雋於有司而道阻且
長弗獲與親策之選置而弗錄朕心惻焉亦授以官庸
示篤叙爾其懋哉可

宗子師鉉量試不中依近降指揮年四十以上

特補承信郎展三年出官

敕某有司考試之法至嚴密也而獨優於宗室子夫既優矣而猶不應令徒以強仕予之初官然必使為三年之淹而後筮仕用示篤叙不為苟私可

宗子汝璽對策中間全寫御題首尾各用一段
湊成特降一官推恩補承信郎

敕具官某策士於庭而無以對宜不在第中以爾屬籍子而不求其備始命以官亦可謂茂恩矣可

廣東提刑李信甫奏朝奉大夫通判德慶府權
英州張公蓋失陷官錢科擾民戶特降一官放
罷永不得與親民差遣

敕具官某嶺表以去廷遠而吏不自愛往往淪胥而為
欺削爾一秩且不得與於民社之寄苟自愛者繼此尚
少懲乎可

忠訓郎趙湧在任不職南劔守臣楊祐按罷輒
敢伏闕妄論守臣特降一官仍押送寄居泉州

拘管

敕具官某爾以屬籍試吏不自貴愛而見劾於州家亦
既虧吾教矣詣闕自疏復繆失實鐫一官俾爾省循可
四川制置丘崇奏承直郎知叙州慶符縣魏良
心侵刻夷人又輕入夷國致殺死巡檢程仲乾
降一官放罷

敕具官某夷人畏廉而服威重爾為邊縣不足於斯二
者而致吾疆吏於死地免官鐫秩是不謂之寬典乎可

知成都府丘崇奏從政郎錄事參軍史定之不
親蒞獄致囚自刎死降一官放罷

敕具官某夫為獄掾而弗躬弗親幽枉多矣囚致於自
盡特其甚較著彰彰者也免官鐫秩是不謂之寬典乎
可

文林郎婺州浦江縣丞趙大亨不遵依提刑司
差委推勘公事輒申任滿離任降一官

敕具官某士而不事事是欲素餐也爾方丞縣而再却

憲臣之檄以自擇便豈非不事事歟按章來上姑鑄一秩繼今知懼斯可從政可

知萬州季圭奏脩職郎萬州司理參軍向紹祖
獄囚繫死降一資放罷

敕具官某爾為獄官而不省囚疾苦至於墮指至於死
而不以告豈非所謂士師不能治士者歟其鑄一階以
警怠事可

止齋集卷十三

謹案第八頁後二行耶律古哩舊作耶律适哩今
改正後仿此

謹案卷十三第一頁後三行枚數勇爵刊本勇訛

男据左傳改





總校官庶吉士臣張能照

校對官檢討臣王鍾健

謄錄監生臣孫起鵬